

東華續錄

道光十三

臣王先謙敬編

臣周潤蕃恭校

道光六年丙戌春正月甲申以籌辦雙城堡屯田妥協加將軍富
俊太子太保○召姚祖同來京調嚴如煜爲陝西按察使以何金
鏞貴州按察使

由貴西
道遷

○乙酉諭軍機大臣等慶祥奏接常德札

覆須於二月進勦即將前派後起官兵一千名派領隊大臣烏凌
阿督帶啟行計二月初間卽已到齊等語慶祥前此所奏調度官
兵並查探逆夷蹤迹鎮以兵威懸以重賞設法將該逆夷等縛獻
疆疆籌畫機宜尙不爲無見何以接據常德札覆二月進勦之言
率令烏凌阿將後起官兵督帶前往試思該逆夷竄匿各布嚕特
地方並無一定巢穴卽使二月間大兵雲集不但張格爾無從擒

捕卽汰劣克等亦游牧無定卡倫外皆外夷部落踣徑以難從何
進兵勦捕慶祥熟悉彼處情形乃因常德之言轉致游牧無據冒
昧撥兵前往著傳旨嚴行申飭常德前因擅發急遞交部議處俟
奏上時再降諭旨此時計算長齡英惠必有一人行抵伊犁慶祥
仍俟伊二人無論何人先到交卸後再馳往喀什噶爾相度情形
遵照節次所降諭旨詳籌妥辦其後起派往官兵該贊參到彼察
看如必須分派應用卽酌量暫留該處若無須如許兵力卽陸續
撤回歸伍伊犁地方緊要烏凌阿等亦有本任應辦事宜如不須
二人在彼著於穆克登布烏凌阿二人內酌留一人聽候調遣其
餘一員卽令管帶撤回官兵仍回本任慶祥總當堅持定見盡心
籌畫用副委任不可輕聽人言致爲搖惑也○甲午調劉彬士爲
刑部右侍郎史致儼爲禮部右侍郎○丁未諭軍機大臣等長齡

奏稱此次慶祥所調伊犁烏魯木齊及各路換防官兵共有四五千名均係未經軍旅之師帶兵又無得力之員不識紀律如必須進兵尚須妥協斟酌不可輕舉妄動張格爾生長外夷路徑最熟我兵不識路徑又無鄉導且出卡尚係布魯特再人卽是霍罕地方官兵到處不能不擾及外夷儻若激成事端遂致復啟邊釁該逆見在托古斯托羅等處游奕之說尙係九十月間探聽之言將來我兵出卡定必聞風遠竄否則又令我兵深入另設詭計我兵追捕愈深一切糧餉軍火文報軍臺並無諳熟官兵經理該逆一日難撤喀什噶爾又無存貯糧餉接濟必致進退爲難等語逆裔張格爾罪犯稽誅隱匿各布魯特地方勾結煽惑必須設法擒獲盡法懲治以張國威第卡倫外路徑叢雜我兵不宜深入慶祥節次所奏陳兵宜威懸賞購緝各事種種尙合機宜

長齡因在途次聞調派各路官兵以爲必欲進兵勦辦未悉該參贊籌畫事宜與節次所降諭旨故有此奏並據奏稱見已詳晰札致慶祥該參贊接信後亦必將見籌機宜札商辦理慶祥到喀什噶爾後惟當體察情形堅持定見相機辦理如能以夷制夷之力將張格爾及巴布頂汰劣克等諸逆悉數殲擒或縛獻數犯固可中國法而靖邊圉如一時不能擒獲賊事慶祥自必籌畫善後之計不至曠日持久老師糜餉進退兩難該參贊務將一切情形通盤熟計悉臻妥善不負委任朕亦不爲遙制也○壬子岳祥以病免調興科爲湖北按察使以吉恒署四川按察使

前任四川按察使

○

是月展賑奉天錦州中前所等處旗戶水災給江蘇沛縣災民口糧貸奉天甯遠州旗民河南鄆陵等七縣甘肅岷州等十二州縣山西襄垣縣直隸寶坻等三縣水災旱災雹災籽種口糧倉穀緩

徵山東濮州等三十三州縣場衛錢漕倉穀

二月癸丑朔費丙章丁憂以邱鳴泰爲湖北布政使戴聰爲山西

按察使

由安徽鹽
運道遷

○丙辰調博啟圖爲戶部左侍郎以阿爾邦阿

爲工部左侍郎

由總管內務
府大臣遷

○庚申

上御經筵○諭軍機大臣

等琦善奏洪湖石工未能開段拆修請擇要試辦坦坡護隄蓄水一摺高堰爲淮揚保障從前工程本屬鞏固百餘年來從無大患卽閒有掣卸亦不至如前年之甚雖因風浪過大蓄清過多實由近年總未認真修理任其塌卸剝落以致爲患甚鉅嚴烺承張文浩失事之後經朕特簡南河卽應徹底勘明認真興辦乃因循敷衍一載有餘毫無把握所辦石工草率了事仍稱灰漿未老不能蓄清直至琦善到彼嚴烺始由清江閱視河工見河身淤高所辦堰工全不足恃無計可施堅主碎石坦坡之議分作五年拋成每

年拋石三十餘萬方禦壩業經堵閉兩年是辦成已須七年之久
朕卽覺其需時糜帑當降旨令琦善等另行妥議茲據琦善奏運
石湖船每年可運碎石二十萬九千一百六十方是運石之船止
有此數斷不能與前奏每年三十餘萬方之數相符計需八年方
能辦成試思禦黃壩兩年不開河漕俱已萬分掣肘豈能運之又
久至十年之後耶況此數年中河身無清水刷滌勢必黃水愈高
又將何所措手在嚴煊之意自以數年之內經風掣塌又可設卹
於碎石未經全拋以掩飾其前此辦理不善之咎且碎石坦坡需
時甚長所費尤鉅若年年拋護有塌卽拋糜帑誤工伊於胡底是
碎石坦坡斷不可行所請試辦一年著無庸議琦善經朕簡任兩
江總督無可推諉此事朕惟責成該督一人前據嚴煊奏山海安
阜四廳境內河身坐灣如關家灘孟家灘九套何家社堯灣過甚

擇要酌估挑切引河一二道以備汎漲散放壅滯成河計估需銀
二十萬兩並接築隄以備大汎又據陳中孚奏請於高堰後三
隄舊址展築二隄期復舊清舊制近年河患不僅在清水之短絀
而在河底之擡高欲期河底刷深仍不外束水攻沙逢灣取直之
法朕聞從前黎世序在徐州辦過引河切離著有成績自應趕緊
辦理切離引河以收速效辦竣後再籌議接築高堰二隄以期蓄
清敵黃該督卽督同淮揚道潘錫恩及河員中結實可靠者次第
興辦總期本年屆完船隻無誤進行明歲重運北來可復舊規方
爲妥協至河工劣員但知借工侵蝕全不以公事爲重主築隄不
挑何之說擬餉誤工其言斷不可聽勉之慎之又該督奏議覆那
彥成奏運通漕糧改用長剝格礙難行一摺那彥成奏到時朕卽
覺其說不可行茲據該督奏敘壩挑河均有所礙長途剝載微變

堪虞以及經費不充丁情苦累所議俱是著無庸議但該督既知長制難行海運又不可久是禦壩斷不能不開總當以疏河蓄清爲已任用正人聽正言矢虛衷而持定見築壩衛清切灘減黃黃水低一寸清水即高一寸俾禦壩可以開放河湖俱復舊規方爲不負委任○辛酉錢寶甯以病免以王庭華爲山西布政使戴宗

杭爲直隸按察使

由江南河庫道遷

○壬戌諭琦善奏海運漕糧儘船收

兌見到商船九百餘隻足運米八十萬石所有兌竣船隻先開赴十墩候風初運沙剝到津卸米後前往奉天買豆催令南歸等語販豆係該商船常年本業且海船利於壓重不能駛放空船自應准其照常往販惟尚有二次兌運必應迅速南下著奉天府尹飭各該地方官俟商船到彼卽令置貨開行無得勒掯並飛咨經過直隸山東各省轉飭沿途海口催令南歸勿任逗留貽誤○癸亥

諭軍機大臣等據陶澍奏海船初運米石見已盡船儘兌陸續開
出十潞地方候過二月初八日風信開行若遇順風旬餘即可抵
津等語海船乘風開行抵津迅速必須將應用剝船及一切事宜
豫爲布置周妥著那彥成卽飭陶樸鄭祖琛等遵照節次奏定章
程卽日籌備妥協以便海船隨到隨剝勿稍遲滯○調邱鳴泰爲
安徽布政使徐承恩爲湖北布政使○甲子書銘休致以惠端爲
盛京兵部侍郎

由左副都御史遷

○丁卯諭軍機大臣等據琦善奏稱見

在黃水已長至三丈有餘兩岸隄工高出水面數尺設伏秋二汛
水漲卽可高與隄平目前救急之計自以增培大隄接築海隄較
挑切工程爲急等語黃河市過凌汛而水已長至三丈有餘增培
大隄接築長隄固是目前急務第黃水出路不暢若不急籌減落
之法僅恃增培隄岸豈能抵禦盛漲是切灘挑河亦係刻不容緩

之工見已黃水增長而嚴烺前奏挑河工程尙止約略估計並未切實勘辦該河督所司何事轉瞬桃汎卽屆不能再任延緩見旣奏稱關家灘應行挑辦引河之處有民間私築土堰亟宜起除著該督卽飭屬剴切曉諭並親往該處詳加覆勘將關家灘等處河勢坐灣地方何處應切何處應挑察看形勢之緩急遴派妥員嚴實估計奏明妥速興辦勿稍遲延致失事機至高堰後應築二隄前據琦善奏稱止能見功於大隄有失之後不能豫固於大隄未掣之先持論固有所見惟此時隄身入水已深旣不能於樁朽根鬆之處一律拆修而碎石護隄之說又迂遠而難行揆諸時勢自以興築二隄爲正辦二隄旣築大隄賴有重門保障又築格隄以爲後戢大隄自更有擎托是二隄之有利無弊其事顯然該督到清江一面勘辦挑切引河事宜一面卽將二隄工程勘估奏明次

第辦理如果於此外另有固隄蓄清善策朕必擇善而從前不稍存成見也○庚午禁各省教職佐雜干預公事○甲戌 上啟鑾謁 西陵○免經過地方額賦十分之三○戊寅 上謁 泰陵

泰東陵 昌陵回鑾○辛巳 上還東師

三月甲申諭軍機大臣等陶澍奏海船初運兌竣仍接續趕辦一摺本年初次試行海運據該撫奏截至二月二十一日止共兌過正耗米一百一十二萬二千餘石事體極爲順利惟海運米石除正耗漕白等米何有給船耗米通計米數有一百六十三萬三千餘石各船不敷裝載不能不分兩次運送一過春夏之交南風司令北船回滬較難自應令初運沙船迅速回糧俾二運得資趕辦本日據天津鎮總兵克什德奏報長洲縣第十三號船一隻於二十九日早潮引進天津海口日內諒已陸續前來廖彰阿等接奉

此旨卽飭該鎮道等遇有海運抵津隨到隨剝不准片刻延滯並嚴飭坐糧廳稽察吏胥經紀人等如有刁難需索立即重懲毋稍姑息總令沙船卸米前往奉天買豆迅速回南以便趕辦二運又陶澍另片奏給船耗米將來兌交額糧後應有餘贖合計不下十萬餘石請查照糧船餘米之例就近官爲收買等語向來南糧餘米俱准在通變賣惟例價向有一定沙船糧船軍商各別若官爲收賣轉啟勒措諸弊自應聽其自便著穆彰阿等查照天津時價出示曉諭如有願將耗米變價者卽聽該處民人照市價收買該商旣可藉以沾潤於該處市價民食亦有裨益○諭據慶祥奏查明賊衆確實下落見在聚集多人勾連串結各布嚕特觀望狐疑不可專恃等語自係實在情形逆夷勾結匪黨分聚六處約有三四千人之多並敢於各要隘安設賊目馬匹互爲聲援情實可惡

亦由於畏懼我兵前往勦捕之故此時調派伊犁及烏魯木齊官兵二千五百名次第到齊分駐各卡適中之地聲威不爲不壯該參贊大臣惟當選派幹練員弁勤加訓練如賊衆竟敢近我卡倫卽應統師迎勦大加懲創若隨卽遠颺斷不可輕易出師致墮奸計總期布置嚴密毋得稍失機宜該逆夷等勾連煽惑以致附從日多各布魯特窺測遷延情殊黠猾若聽其日相聯結更恐滋蔓難圖計惟有陽示寬大設法以解散其黨與一面隨時確密偵探相機籌辦著慶祥剴切曉諭各布魯特中其效順者如能計縛渠魁自當立予懋賞卽從逆之汰劣克等若能悔罪投誠自相解散亦當待以不死酌予恩施並檄諭霍罕等處如各逆竄投毋許收留眷庇若將首賊擒戮不但賞其頭人卽出力之散小布魯特亦著覈明賞賜使其知感知畏庶可伸威歲事慶祥惟當慎益加慎

勉益加勉以副委任○乙酉以補填爲貴州布政使周之琦爲浙

江按察使

由四川鹽茶道遷

○丁亥

上親耕耤田

○已丑諭軍機大臣

等琦善奏查勘海口及切挑引河情形並籌辦運河隄閘飭估洪湖隄工一摺前因高堰石工不固旣不能普律拆修不得不亟籌保護是以降旨令琦善將二隄工程勘估興辦茲據該督奏稱淮楊道潘錫恩見有建築二隄不若增培大隄之稟並復細詢廳營俱稱建築二隄止可爲隄後保障而不能恃以蓄清二隄地勢較低大隄有失二隄仍不免有過水之虞與潘錫恩之言相同朕閱該道所稟將隄後二河展挑寬深所挑之土卽加培大隄東面不足再隔河取土幫成頂寬十丈坡用三收之大隄通隄一律似與蓄清較爲近理惟前此陳中孚等所請興築二隄加築格隄以爲後戢總係爲保衛大隄起見如果加培大隄更有把握自當擇善

而從著琦善卽親往查勘或應專辦大隄或再兼築二隄逐一將各工覈實估計迅速奏明興辦至該道所舉厚水通船一法從前既未經辦過自不宜冒昧輕舉見在黃水不能剋期消落而本年回空南下斷不能不開闢放行其厚水能否卽將清水擡高足資抵禦黃流不至有倒灌淺閣之虞琦善察看情形如果照辦可期得濟卽於盤壩漕糧完竣後先將加運銅船調集試行一切估辦開壩水車等項准其覈銷其增培接築兩岸河隄及切灘挑河各工該督見已詳勘撥銀趕辦務卽督飭道廳等照估挑築勒限汛前一律完工其關家灘地勢既勦與九套何家社有迎溜背溜之分未便徒糜經費著俟霜降水落後再行相機挑切其翻泥車一項亦疏濬成法該督已飭聽汛各官督令兵夫如法施行總期有神刷滌庶免日增淤墊也○癸巳諭據張井奏熟籌早啟禦黃壩

一摺張井會勘南河情形悉心講求不分畛域甚屬急公於河務亦頗有識見著卽調補江南河道總督嚴烜調任南河正當河湖交病之時一籌莫展致禦黃壩至今不能啟放實屬辦理不善姑念其前在東河任內修守尙無貽誤著降三品頂帶署理河東河道總督以觀後效張井嚴烜俱各卽赴新任無庸來京請卹○諭軍機大臣等據琦善奏查勘江境湖河敝壞已極設法酌籌疏治五條除接築長隄逢灣取直該督等已奏明辦理嚴守閘壩由嚴烜另行酌定外其修復溶船築作平灘對壩并緩俟霜降後不能辦理並須一二年後方可收黃水落低之效未免緩不濟急本日又據張井奏熟籌早啟禦黃壩一摺據稱黃河病在中滿擬照阿桂改河避險導使繞避高淤由安東縣東門上下在北面另築新隄卽以北隄改作南隄中間抽挑引河約深一丈卽由東門工以

下導河改由北面傍舊河行走至絲網浜以下仍歸見在海口中
閒又無淤灘阻隔似可暢順東趨自東門工以上至禦黃壩不過
六十里去路既暢上必掣深計可落水四五尺以外見在黃水高
清水五尺二寸得黃水落低五尺餘則立啟禦黃壩展寬聚清壩
並接長蓋壩挑偏清水暢出刷黃底淤更可攻盡彼時湖水不過
收七八尺其勢已可建瓴更無虞風浪傷及石工此時剋期趕緊
六七月閒可開設新河儻汛期已屆不妨先行勘估俟霜降後辦
理等語朕思黃河受病已久當此極敝之時若僅拘守成法加高
隄堰束水攻沙一時斷難遽收速效自應改絃更張因勢利導以
遂其就下之性且黃河淤墊既甚與其有意外之虞必致淹沒田
廬被災甚廣何如改河避險先以人力變之爲一勞永逸之計所
謂窮則變變則通矣至濱海一帶蘆葦沮洳並無城郭自屬無害